

Per la mort da Chasper Stupan, anterior director da RTR


Chasper Stupan è mort ils 3 d'october 2012 a Cuira; betg nunspetgadain. Già dapi ditg era el malsaun. L'avust 2011 ha el stuì prender cumià surpudentamain e nunspetgadain da sia consorta Ursi Stupan-Schibli, sia cumpogna da vita dapi 1971. Quella mort ha tschancunà Chasper. Pauc dapli ch'in onn pli tard ha er el fatg il viadi grond.

Naschi è Chasper Stupan sco vischin d'Ardez ils 17 d'avust 1941 a St. Maria en Val Müstair. Sia uffanza e giuventetgna ha el passentà a S-chanf ed a Segl Maria. L'Engiadin'Ota, questa vasta regiun da rara bellezza, ha furmà il giuven Chasper da maniera che questa furmazion ha tegnì tut sia vita: ina tenuta liberala sco princip da vita, chapientscha per ils auters, avert per dumondas da svilup tecnic ed economic, affecziun per il turissem ed anc dapli per il sport e na d'emblidar: il puter. Quest idiom tgrava Chasper Stupan sco la poppa da ses egls.

1962 finescha el il seminari da scolasts a Cuira e surpanda ina plazza sco magister a San Murezzan. 15 onns instruescha el là e sa partipescha a la vita publica dal vitg e da la regiun. In temp era sco suppleant da la Partida liberaldemocratica en il cussegl grond. Spezialmain s'engascha el dentant en organisaziuns da sport, fa il pledader sin plazzas da sport ed arriva uschia er en il mund da las medias cun commentar sin DRS 1 ils gieus da hockey dal HCD. E quests commentaris, en ses dialect aleman marcant e persunal, daveentan legends.

1977 tschern la CRR (Cuminanza rumantscha da radio e televisiun) Chasper Stupan sco «collavuratur da program da las emissiuns rumantschas a Cuira». Da quest temp cumpeteva la tschern dal persunal a la societad purtadra da radio e televisiun. Stefan Sonder presidiava la CRR e mintga tschern era bunamain in act statal. Il post da programs da las emissiuns rumantschas era amministrativamain ed ierarchicamain ina filiala da Radio DRS a Basilea e quai che pertutgava las emissiuns da televisiun da SF DRS a Turitg. Clemens Pally timunava il post cun ses pitschen team en il bajetg nov a la via dal teater 1 a Cuira.

1983 tschern la medema CRR, questa giada sut il presidi da Fidel Caviezel, Chasper Stupan sco manader dal post da



programs. El entra en uffizi 1984 cun il titel d'in schef da partiziun ed ha da dar pled e fatg a Cuira a la CRR, a Basilea al director da radio Andreas Blum ed a Turitg a quel da la televisiun Ulrich Kündig, suenter Peter Schellenberg. Betg ina simpla constellaziun per manar il post cun ses 23 collavuratur e collavuraturas!

Chasper Stupan senta che betg dumondas instituziunalas èn ussa d'impurtanza, era sche questas domineschan la CRR. El vesa ed auda che la SRG SSR è en cumplain svilup. En Svizra romanda, anc dapli en Svizra taliana ed er en Svizra tudestga expandescha la SRG SSR. Novs studios vegnan construids, novas emissiuns realisadas, il svilup tecnic pussibilescha da distribuir ils programs. Leon Schlumpf, 1984 president da la confederaziun, «regala» als Rumantschs la segunda chadaina UUC per il Grischun. Las emissiuns rumantschas da radio pon ussa vegnir emessas sur questa chadaina e betg marginalmain en il program da radio da DRS 1 e 2. Er il Radio Rumantsch cumenza ad expandir: 1984 vegn l'emissiun «Allegra» introducida. Dues uras emissiun d'accompagnament! Tge di da festa che quai è stà cura che l'emprim «Allegra» è vegnì emess – live!

Il clima en Svizra è favuraivel. Rumantschas e Rumantschs giandan gronda simpatia. La politica da linguatg e cultura da la Lia Rumantscha – e dad autras organisaziuns rumantschas – è ambiziosa, mo coerenta e communitgada medialmain bain en tut la Svizra. In bun suttapas era per la CRR e per il post da programs.

Nunstanclentaivlamain lavura Chasper Stupan per dapli uras da program tant en il radio sco er en la televisiun. El prepara il terren cun arguments e cun buna lavur a Berna, giada là la confidenza e vegn uschia da recaltgar ils meds necessaris per radio e televisiun rumantscha en il Grischun.

Betg da far curvien che tant Chasper Stupan sco era Fidel Caviezel s'engaschan ussa per l'autonomia dal post da programs a Cuira. 1992 daventa il post da programs rumantsch ina da las quatter unitads d'interpresa da la SRG SSR. RTR Radiotelevisiun Rumantscha è naschi, Chasper Stupan l'emprim director. A chaschun da la reorganisaziun da la SRG cloma il nov director general

Armin Walpen 1996 Chasper Stupan en il comité directiv naziunal. Dapi lura è er il director da RTR commember da quest gremi naziunal suprem, sco quels da SRF, RTS e RSI.

La fin d'avust 2001 po Chasper Stupan surdar a ses successur Bernard Cathomas ina chasa bain fittada ed en urden: 108 collavuraturas e collavuratur, in program dal di da radio e pliras emissiuns singulas da televisiun. RTR giada la stima e l'acceptanza dal public.

El sez va en pensiun anticipada cun 60 onns e vul giudair la saira da la vita cun sia consorta Ursi. Ils plans èn fatgs: viagiar en regiuns chaudas, il pli gugent sin inslas da la Grezia u giudair l'abitaziun en il Tessin. Bain spert dentant sa fan udir mals e malsognas. Chasper patescha. La mort da sia consorta n'ha el betg supportà. Las davosas emnas da sia vita passenta el en la residenza dal Parc Bener a Cuira.

Chasper Stupan era in carstgaun da gronda bainvulientscha e cordialitad e «d'ina loialitad paschaivla» sco quai che Luregn Mathias Cavely, alura il president da la societad purtadra SRG.R, scriva en La Quotidiana dals 24 d'avust 2001. Gea, Chasper guntgiva tant sco mo pussaivel conflicts e situaziuns malempervaivlas. Quellas empruvava el da lugar e schliar en in discurs persunal ed en il senn dal consens.

Oz prendain nus cumià d'ina persunalitad rumantscha e grischuna apprezziada en ils pli vasts circuls da la societad e d'in collega che veva ina gronda passiu: Programs attractivs fatgs bain en furma, cuntegn e linguatg.

Mariano Tschuur